



Headlines

- मुलुवै दे बाकी हिस्सें आहला लेखा रक्खड़ी दा ध्यार समूलचे जम्मू खित्ते च बी बड़े गै जोश कन्नै मनाया जा'रदा ऐ।
- विधानसभा चुनां दे पैहले गेड़ लेई कल अधिसूचना जारी होग। औंदे असेंबली चुनाएं लेई अखीरी मतदाता सूचियें गी कल जारी होने दी मेद।
- जम्मू-कश्मीर च औंदे विधानसभा चुनाएं गितै मेदवारें दे नांs गी मुकदा रूप दित्ता जाग, आखेआ केंद्री मंत्री ते जम्मू-कश्मीर बीजेपी चुनांs प्रभारी जी. किशन रेड्डी होरें।
- शरारती तत्वे पर मसनुई ज्ञान पर आधारित चेहरें दी पंछान आहली प्रणाली ड्रोन, सीसीटीवी राएं राश्ट्री जरनैली शिड़का पर तक्क रखने गितै इस्तेमाल कीती जा'रदी ऐ।



Rakhi-Celebration Jammu

देसै दे बाकी हिस्सें आंगर रक्खड़ी दा ध्यार जम्मू खित्ते च बी मनाया गेआ। रक्खड़ी देसा दा इक महत्वपूर्ण ध्यार ऐ। एह ध्यार भैन-भ्राएं दे प्यार दा प्रतीक ऐ। इस दिन भैन-भ्राs दी कलाई उप्पर इक धागा बनदी ऐ जिसी रक्खड़ी आखदे ना। हिंदू कलंडर मताबक रक्खड़ी हर बरे सौन म्हीने दी पुण्या गी मनाई जंदी ऐ। जम्मू च अज्ज रक्खड़ी दा एह ध्यार बड़े उत्साह कन्नै मनाया गेआ। इस ध्यार दे मौके पर गल्ल करदे होई बच्चें आखेआ।



Rakhi-Old Age Home

रक्खड़ी दा ध्यार अज्ज जम्मू दे वृद्ध आशरम ते बाल निकेतन अम्बफला च बी मनाया गेआ, जेदे च लोकें, बुजुर्गे ते बाल निकेतन दे बच्चें गी रक्खड़ी बन्नी। वृद्ध आसरम दे मुख्व आई.डी. सोनी होरें आखेआ जे सब्बनें रलिये बुजुर्गे कन्नै खुशियां मनाइयां। बाल निकेतन च 12एं कुड़ियें, जागतें गी रक्खड़ियां बन्नियां। जम्मू दे वृद्ध आशरम दे मुख्व आई.डी सोनी, प्रीतम चंद ते निधि होरें अपनी गल्ल सांझा कीती।



Rakhi-Poonch

रक्खड़ी दा ध्यार अज्ज जिला पुंछ दे भाविन महिला संगठन आस्सेया बड़े गै जोश कन्नै मनाया गेआ जेदे च उनें बीएसएफ ते फौजी जुआनें, जेडे पुंछ दे भारत पाकिस्तान बन्ने पर तैनात न, उनेंगी रक्खड़ी बन्नी ते उंदी लम्मी उम्री दी बी कामना कीती। इस मौके उप्पर बड़ी मती गिनतरी च बीएसएफ ते फौजी जुआन उत्थे मजूद हे। स्हाड़े संवाददाता अनुभव मिसरी हुंदे कन्नै महिला संगठन नै गल्ल करदे होई आखेआ।



## Rakhi-Celebration

जियां के अस्स सारे जानने आं जे फौजी जवान अपने घरें थमां मीलां दूर न ते बन्ने उप्पर देश दी सेवा ते रक्षा करा'रदे ना। इस करी स्हाढा फर्ज बनदा ऐ जे अस्स उंदी भैनां बनियै उनेंगी रक्खड़ी बनचे। उंदे कन्नै एहू रक्खड़ी दा ध्यार मनाना इक्क बडा गै शैल अनुभव हा। राजौरी जिला दे मकामी स्कूलें दे बच्चें इस बारै अपने विचार सांझे कीते।

<><><><><><>

## Prez. Shankar Dyal

राश्ट्रपति द्रौपदी मुर्मू होरें अज्ज राश्ट्रपति भवन च साबका राश्ट्रपति डॉ. शंकर दयाल शर्मा जी गी उंदी जयंती उप्पर शरधांजलि अर्पित कीती। राश्ट्रपति भवन दे अधिकारियें बी डॉ. शंकर दयाल शर्मा हुंदे फोटू पर फुल्ल चढाइयै शरधांजलि अर्पित कीती।

<><><><><><>

## EX-Army Chief

साबका सेना प्रमुख जनरल सुंदरराजन पदमनाभम हुंदा अज्ज चेन्नई च अपने घर काल होई गेआ। ओहू 83एं बरें दे हे। एहू 20में चीफ ऑफ आर्मी स्टाफ हे। इंदा जन्म 5 दिसंबर 1940 गी केरल दे त्रिवेंद्रम च होआ हा। एहू प्रतिष्ठित राश्ट्री इंडियन मिलिटरी कालेज देहरादून ते नेशनल डिफेंस अकैडमी, Khadakwasla Pune दे साबका छात्र हे। 13 दिसंबर 1959 गी इंडियन मिलिटरी अकैडमी थमां स्नातक होने दे बाद उनेंगी तोपखाना दी रेजीमेंट च कमशन कीता गेआ।

<><><><><><>

## Election-Notification

जम्मू-कश्मीर च 2024 दे विधानसभा दे पैहले चरण दे आम चुनावें दी अधिसूचना कल जारी कीती जाग। आकाशवाणी जम्मू दे संवाददाता दी रिपोर्ट मुजब अनंतनाग, शोपियां, कुलगाम, रामबन, किशतवाड़ ते डोडा जिलें दे 24 विधानसभा क्षेत्रें च पैहले चरण दे तैहत नामांकन दाखल कराने दी खीरी तरीक 27 अगस्त तैह कीती गई ऐ। ओहूदे मगरा ध्याडे नामजदगी दी जांच कीती जाग। नामांकन वापस लैने दी खीरी तरीक 30 अगस्त 2024 तैय कीती गई ऐ ते मतदान 18 सितंबर गी होग। इस थमां पैहले हदबंदी दे विधानसभा क्षेत्रें दी गिनतरी 90 करी दिती गई ऐ ते चुनावें च चरणें च इनें 24, 26 ते 40 विधानसभा क्षेत्रें च 18 सितंबर, 25 सितंबर ते 1 अक्तूबर की होंगन ते वोटें दी गिनतरी 4 अक्तूबर गी होग ते उसै दिन नतीजे औने दी बी मेद ऐ। सुप्रीम कोर्ट नै पिछले बरे दिसंबर च अनुच्छेद 370 दे प्रावधानें बारै अपने फैसले च 30 सितंबर 2024 तक्कर जम्मू-कश्मीर च विधानसभा चुनावें करोआने दे निर्देश दित्ते हे। केंद्र शासित प्रदेश जम्मू-कश्मीर च औने आहले विधानसभा चुनावें लेई खीरी मतदाताएं दी गिनतरी आहली सूची यानि इलेक्टरोल रोल कल जारी कीते जाने दी मेद ऐ जिंदे च मतदाताएं दी गिनतरी 90 लक्ख दे करीब होने दी मेद ऐ। इलाके ते मतदाताएं दी गिनतरी आहली एहू सूची इस बारी बड़ी मती महत्व आहली होग कीजे हदबंदी दी कवायद दे मगरा मते सारे विधानसभा क्षेत्रें दी सीमाएं च बदलाव कीता गेआ ऐ ते विधानसभा सीटें दी गिनतरी बी 83 थमां 90 होई

गेई ऐ। तकरीबन 2 मिलियन मतदाताएं शां करीब 21 लक्ख मतदाता युवा न ते 20 थमां 29 बरें दी बरेसू दे बश्कार न। जम्मू-कश्मीर दियें 90 विधानसभा सीटें शां 74 सीटां जनरल, 7 अनुसूचित जाति दे मेदवारें लेई ते 9 अनुसूचित जनजाति दे मेदवारें लेई आरक्षित न।

<><><><><><>

### BJP-Candidate

जम्मू-कश्मीर च होने आहले विधानसभा चुनाएं थमां पैहले केंद्री मंत्री ते तेलंगाना भाजपा अध्यक्ष जी किशन रेड्डी होरें अज्ज आखेआ ऐ जे पार्टी दे राश्ट्री अध्यक्ष ते केंद्री मंत्री जे.पी नड्डा हुंदी अगुवाई च मेदवारें दे नाएं गी तौलें गै खीरी रूप दित्ता जाग। पार्टी दफ्तर च भाजपा चुनांs कमेटी दी बैठक उप्पर श्री रेड्डी होरें आखेआ जे मेदवारें बारै खीरी फैसला राश्ट्री चुनांs कमेटी दा होग। राज्यें दी चुनांs कमेटी नाएं दी सफारश करग फिर उस थमां अस पैनल दी सफारश करगे। अखीर च भाजपा दे राश्ट्री अध्यक्ष ते केंद्री मंत्री जे.पी.नड्डा दी अगुवाई च मेदवारें दे नां फाइनल कीते जांगन। उनें आखेआ जे नामांकन दी खीरी तरीक 27 अगस्त ऐ, इस करी एहदी घोषणा इस हफते गै कीती जाग। उनें एह बी आखेआ जे पार्टी दा मुख मकसद जम्मू-कश्मीर गी आतंकवाद, भाई-भतीजावाद थमां बचाना ऐ ते एहदे आस्तै पार्टी इक जुट होइयै कम्म करा'रदी ऐ। जम्मू-कश्मीर थमां अनुच्छेद 370 दे रद्द होने दे बाद इत्थें भाईचरा ते शांति दा माहौल कायम ऐ। वोटें दी गिनतरी 4 अक्तूबर गी होग ते एह चुनांs 370 रद्द होने दे बाद जम्मू-कश्मीर च पैहला चुनांs ऐ।

<><><><><><>

### Security-NHW

पिछले किश समें च डोडा, रामबन ते उधमपुर जिलें दियें उच्चियें थारें पर टाक्करे आहलियां घटनां बदने दे बाद जम्मू-श्रीनगर राश्ट्रीय जरनैली शिडक ते बटोत-डोडा-किश्तवाड़ राश्ट्रीय जरनैली शिडकें उप्पर सुरक्षा गी होर निग्गर करी दितता गेआ ऐ। आकाशवाणी जम्मू संवाददाता दी रिपोर्ट मुजब शरारती तत्वं उप्पर तक्क रक्खने गितै मसनुई ज्ञान आधारित चेहरें दी पंछान आहली प्रणाली, ड्रोनें ते सी.सी.टी.सी राएं तक्क रक्खी जा'रदी ऐ। टाक्करे दे बाद उधमपुर ते रियासी जिलें दियें उच्चियें थारें च सुरक्षा दे निग्गर इंतजाम कीते गेदे न। पुलस ते सुरक्षा बलें बटोत-डोडा-किश्तवाड़ राश्ट्रीय जरनैली शिडका ते जम्मू-श्रीनगर राश्ट्रीय जरनैली शिडका पर जांच गितै नाके लाए गेदे न तां जे कुसै बी माड़ी घटना गी रोकेया जाई सकै। उधमपुर, चनैनी, पत्नीटाँप, सनासर, अस्सर, बटोत, डोडा, किश्तवाड़, रामबन, बनिहाल, रामसू ते होरनें थारें परां पुलस ते सुरक्षाबलें दी बाद्दू नफरी गी तैनात कीता गेआ ऐ। ग्राएं च रक्षा गार्ड रातीं बी गश्त लाई दी ऐ। सब्बै सुरक्षा एजेंसियां हाई अलर्ट उप्पर न ते वरिष्ठ फौजी ते पुलस अफसरें गी रोज दी विनाह पर हालात उप्पर नेडमी तक्क रक्खने गितै बटोत ते पत्नीटाँप इलाकें च तैनात कीता गेदा ऐ। तोआई घेराबंदी ते तपाशी अभियान पत्नीटाँप, सनासर, अस्सर, बटोत, कुद ते चनैनी इलाकें च कीती गेई ऐ।

<><><><><><>

## ADC-Bhaderwah

भद्रवाह दे अडिशनल डिप्टी कमिशनर सुनील कुमार होरें राजनैतिक दलें दे नुमाइंदें कन्नै बैठक कीती ते विधानसभा चुनाएं दे शांतिपूर्ण ते सुचारू संचालन लेई सब्बनें गी आचार संहिता दे दिशा-निर्देशें दा पालन करने लेई आखेआ। एडीसी होरें सारें मतदाताएं गी अपील कीती ऐ जे ओहू 18 सितंबर गी अपने मत दा इस्तेमाल करियै लोकतंत्र गी होर मजबूत करना डोडा जिले च पैहले चरण च मतदान होने न जेदे लेई नामांकन भरने दी प्रक्रिया कल थमां शुरू होई जाग। इस मौके पर भद्रवाह दे एडीसी सुनील कुमार होरें आखेआ।

<><><><><><>

## Sitharaman-Review Meet

केंद्री खजाना मंत्री निर्मला सीतारमण होरें अज्ज नमीं दिल्ली च इक बैठक च सार्वजनिक क्षेत्र दे बैंकें दे प्रदर्शन दा जायजा लैता। बैठका च सार्वजनिक क्षेत्र दे बैंक दे चीफ एग्जीक्यूटिव अफसर, प्रबंध निदेशक, खजाना सेवाएं दे विभाग दे सचिव डॉ. विवेक जोशी ते होरनें अफसर शामिल हे। बैठका दौरान सुश्री सीतारमण होरें जमा वृद्धि दोआर शां जमा अनुपात ते संपत्ति सरबंधी म्यार जेड़ी जे बैंक सरबंधी हालात गी दर्शादि ना। खजाना मंत्री होरें सरकारी पैहलें, जियां जे पीएम आवास योजना, पी.एम सूर्या घर ते पी.एम विश्वकर्मा योजना जनेई पैहल तैहत सार्वजनिक क्षेत्र दे बैंकें दे प्रदर्शन दा जायजा लैता। एहू सुश्री सीतारमण हुंदी बैंकें कन्नै मोदी सरकार दी त्री बारी सरकार बनने दे बाद खजाना मंत्री दे तौरा पर पैहलकी जायजा बैठक ही। बाद च खजाना मंत्री होर मकामी ग्रामीण बैंकें दे प्रदर्शन दा बी जायजा लैंगन।

<><><><><><>